

存

悔

齋

集

存悔齋集卷十一

萍鄉劉鳳誥金門

文

張石農司馬遺集序

易教以言不盡意爲極致詩教何獨不然言餘于意者非言之
餘實意之盡凡文皆無當也況于詩之限以聲韻格律者乎吾
友石農張君以將家子奮於文實相國文貞公系幼隨其兄平
伯食貧攻苦長而遨遊四方與名卿大夫相周旋問學日進而
風誼之篤往往形諸詠歌方其足跡所到笮水模山批風抹月
振才人跌宕之奇大而洋洋千言微及粃粃小物性情勃發興
寄俱焉兄及弟壘奏篴和不同而同若盡洩而不留餘蘊者迨

石農成進士斂其英華一歸矩度功力積久則又一衷聖賢理
道以立言不妄侈沿襲風雅爲能事其詠古史尤最擅長操縱
在手斷制在胸弗專求纖俊之事料蓋言與意稱意行言宣所
謂不以辭害意之微旨也爲齊滕宰更數任撫字之餘吮毫毫
輟迄平伯下世石農亦以假守沛州卒官舉昆友數十年苦志
切劘僅有叢殘賸藁今所編石農遺集平伯客唘諸詩皆兩人
少壯所爲伏而審誦可以知其作詩之才之品各有不可一世
者在奚必區區以某家某派定之惜其詩不盡存不得而盡傳
要其忠厚悱惻之本原固有溢於語言文字之外者悠悠我思
不禁掩卷而長喟也

座主鐵樵庵師詩文集序

太宰鐵梅庵師以文學受

先朝恩遇宣猷中外負峻望五十年

今上初元賜三品卿銜以禮致仕功名垂竹帛文章壽金石而其生平自得或傳或猶未盡傳宜深人仰止之慕也誥奉師教越三十年熟窺不朽之業立言爲重裒錄師著匯成鉅編請版行於世首列年譜二卷皆自紀六十以前閱歷建樹事實次諸體文四卷詩五卷多汰存者次玉門詩鈔一卷詩餘一卷旣集成師笑而頷之曰子不綦好事矣乎何弗予規而予譽云者誥願竊有述焉師之事

純廟也掌王禮十年廷試廣和數獎能文爾時躬贊

奎隆禪授禪饗朝會巡藉菴獮諸大儀臯拜夔揚自公載筆故

其文典質而昌明兩典春闈三掄秋貢極藻鑑天下人才之盛
休沐之暇進及門商榷今古間從當時名公卿上下其議論有
得輒書故其文深厚而邃密少爲貴公子稍長爲貧諸生娛親
友弟絃誦不輟偕吾師母夫人研六法習詩射服官後無家計
累職事舉而學力日以強故其文本摯情而多善氣泊逢

睿皇親政留守鄴京轉督漕賦大東開府江左右節制日籌畫
治吏治民治軍治河及鹽粟盜賊諸劇務每於極勞之際借江
山之靈氣寫民物之痼瘵卽政卽學初無二致故其文與詩不
屑屑摹某家某格而自無不躡括而精到者迄乎西行萬里耳
目益雄承平馭邊節旄壯矣進爲翰林學士更進拜尙書皆塞
外所遷官遭遇之奇古所未有宜其詩文亦古所絕無者晚乃

偶綴詩餘一卷以寄閑情備作家一體斯亦大儒不遺小道之意也師性博達當事敢爲無少顧忌與人交和易可親不翁翁熱而肝膽有畢露者居恒接士夫外叢林高行縱談慧業鈴轆下走竊聽吟聲往往於翰墨間無在不行其真意師今年七十繼此有作行行爲續編世之讀會昌長慶集者穆然想見當日風儀文如其人斯集不讓二賢專美矣爰拜而識之

全州馬氏譜序

造父封於趙爲趙氏趙奢食邑馬服則爲馬氏皆以地爲氏也全州馬生竹亭余視學粵西時所得士其人淵靜純厚稟節母教以自立並悉其宗出於趙自江右遷粵爲州著姓生以嘉慶己未成進士官比部值其族修譜成問敘于余按譜自宋淳熙

時有君三卜居州南金堂村是爲全派始祖至明初定爲七房
新唐書表姓各分房別親疏也於例爲善先是其族人進士莫
三及四品銜柱臣孝子萬支欲考勒成書未克卒業今三君之
子繼之可謂賢矣余惟禮曰宗以族得民敦好聯情王政所重
而合譜之禁且著於功令蓋晉魏以降士忘其本外附顯族與
之黨比宗法其日替甚馬氏所修譜上邇淳熙信而可徵又徧
採先塋碑誌核明世次彙述成帙秩乎其序自明設科領鄉薦
者三十有七人登進士者三人食德揚芬門閭滋大是足以風
其鄉邑而勉其子孫矣全州距京師七千餘里錯處苗壤上承
聖天子德化覃播遠方其嚮風知義亦必內地人士有以矜式
之而粵西人戶土著恒鮮所稱樹多旅生人多寄籍亦地氣然

也馬氏實爲故家則其能繼家聲以自表於嶺外殆所謂儒以道得民者又豈惟爲馬氏願之也哉生知古今之事明於盛衰之理王者之訓聖賢之書能世守之馬氏之興其未艾歟至乎譜牒之傳言必有據無濫無夸所以敬其祖也可以具詳本幹之榮與夫陟萼之寢衍而寢盛者焉

譚氏譜序

江右俗古質家於是者恒不忍輕去其鄉亦不屑屑然援藉華右以爲光寵如今德化譚氏先世自楚祁陽浯溪宦於江葬於江其子孫樂山川之雄偉安習尙之淳厚遂以著籍於江遡唐開元迄今言譚者第其族望頌唐刺史秋堂公遺愛於弗衰而洪筠諸派一以江州治所墓所爲基始此譚氏之後之愈久而

愈熾卓然故大家所留貽深期於繼繼繩繩者之代有人也刺
史裔孫晉廬學博紹遠誦芬博徵遺帙偕其族之孝秀訂舊譜
而新之蓋舊譜多從洪濤烈焰之餘存什一於千百幸族姓蕃
衍不出江右一鄉粟主滌塵苔碑剝土皆可攷而得者譜系以
圖凡夫家儀冢域世次遷徙釐然如指諸掌善哉乎仁人孝子
之用心如此其勤且篤矣乎子惟譜學之壞壞於後世門閥相
高而真偽糅紊歐陽公謂三世不修譜爲不孝誠以賜族之禮
不行遂致昧其得姓之本原若譚氏者詩傳所稱昭然耳目而
千百年絕續之會到於今寔大以昌屬學博二子曰煒曰洵來
謁述其重輯之由併以新刻相畧令人次第循繹油然而生孝弟
之心而又嘉學博之繼述詳慎二子之黽勉發聞爲能行其志

之所自得也斯亦足以勸吾江右之儆俗而馨世澤於孔長矣
爰序而歸之

山東辛酉鄉試同年錄序

嘉慶辛酉東闈榜放新舉子集於濟南諏吉日擇廣堂而會迓
余上座拜且觴焉已乃哀所爲同年齒錄者問余敘伊所以志
榮選敦好會明長少而亦藉以快其平居攻苦之效與夫父兄
師宿教學期望者庶幾有所酬耶間考唐登科故事舉場俱捷
謂之同年旣捷列名謂之題名大會謂之團宴率皆進士佳話
顧如唐之舉人者特同解試而已今舉人上南宮獻天府實無
異進士則以其一朝策名之盛悉疏遠不知族氏扞格未親言
笑之人相與旅掛而升問年而坐酌酒歌詩竭歡彌日其風之

古者歟其道義文章之交合有神蓋權輿於此山東跨青徐沈
三州連魯齊宋衛諸大國河靈嶽秀終古鬱蟠其間賢者才者
有文辭經術者或修先緒或起單門奮而爲時發揚夫豈斤斤
焉科目之足識然而功名激勸之道自其始初萃聚泊乎異日
之流傳出處後先不可磨滅人情於斯恒有極不忘者朱文公
及文信國兩榜登科錄至今具存夫人如朱如文而以科日照
灼人世者乎視其錄中有若而人否傳不傳故區區事則卽今
一方登進之彥籍其姓名貫系里居年歲釐然著於編誠不可
少之舉諸舉子盍仰副

朝廷作人邛化翩然直上勉爲有用良材毋徒以是侈聲氣之
孚也則所臻者其遠矣哉爰樂爲序之

龍江外紀序

古者能使絕域別爲一科何人好讀異書不求甚解爰有西林
覺羅氏善擇政暇博搜土風寫往代墨雲老上飛鴉則萬點俱
寒話幾家青柳北盟負駝則一行猶腫然此或閒情也抑亦才
筆也堂堂精食之人慄慄銀官之氣判不妄下語豈徒作彼弓
靶識字之夫未害裂衫書壯琵琶擁帳之子類能飲酒述悲無
非蒼蒼茫茫敕勒歌不則吾吾牙牙鮮卑語而已茲龍江外紀
括燕山舊衛之輿圖本遼京三省之地志左右龍虎咫尺方蓬
日落不昏星高愈大二嶺齒率夫興安千卡塘撐夫雅薩隴榆
田稼唐哉有土之精谷馬河激包盡無人之境邇能釋弮講禮
互市滋豐習人武而人仁捍我陲而我圉非復冰天萬里旄禿

堪憐早有春風滿關角吹不凍則是編也上宣

幃幕旁拓繩維以示按堵六城樂生八種而養而教無藉無癘
熙熙乎椎牛其饗登臺其舞焉信美哉君方補管疾書我愛翦
鐙細讀體務見大事取傳信不作無益此謂知本將使羣旃問
俗載在征輶奚啻螺掌數程便於行帑客把青銅鏡子不知白
髮之日生雀呼黃豆辨兒爲報赤髮之欲返

平樂恒太守四旬雙壽序

歲癸丑七月平樂牧令諸君以余按校畢屬敝說以祝太守敬
軒恒公暨賢儷夫人蔀慕氏四十偕壽余諾之大爲之欣且頌
也公嘗分守吾袁多惠政又數攝吾江右諸大郡嘉勤遠愛柔
梓問詠思茂憩無已時余知公明德稔著而聞公之樂壽偕臧

尤不容不具道其實以展舊部之私匪特今屬官之恭其長吏
云爾也記稱四十曰強而仕疏釋強二義一主智一主力余謂
此特推廣義解之詞至若仕於公家智與力在所必勝而禮必
四十始曰強者則視年華富盛以操貞固幹事之本如算家以
有餘爲強古木蘭詩所云策勲十二轉賞賜百千強可證也公
起鼎族清宦流風門才益拓其緒自其爲仕蚤歲食祿於

朝師胄監之譽髦掌綸閣之制草進退容與斐然文章秩滿察
優等遂受

天子覲簡之榮畀其治郡事而夫人以名家女佐公內治相從
畫舫南來江城繞衙鶴飛視夜星爛其賢助之力匪馮公爰得
以朝夕從公勵志建樹是時僚采譽之翕然同口憲司薦之殷

然交牘昨歲壬子乃復以上考入對於

廷旋注

御屏拜守平樂命公之名位具立由其智諳過人力又足以副之而年之強且及時加恁以自振也顧以公之治績如風斯行江之民稱之聞今思之慕之粵之民其亦猶是心焉者平郡控引桂梧襟帶蒙賀諸峒蠻箐落雜處爲府江扼要之區若農田權賦論課禁詰兵餉傳驛諸政皆必表其地望之峻推其仁聞之博以舉其職務之繁公下車甫半年而條理綜覈巨細洪纖罔不秩乎有序卽其審要握機御物以整而感人以誠可卜他日報最無過之者竊以余聞見所親及觀之他舉或需以月需以年若今議復平樂書院不過集學校中人以成興學校盛舉

口畫面命一日而就其德教既洽其地應也若神事詳於別所
爲道鄉書院記中議成之日眉夫人懋悅僚吏相率舉觴余得
詣黃堂稱賀且語牧令諸君曰公之誕日在秋九余巡試遠郡
計未獲躬介齊眉請更徵餽義用廣善頌可乎攷詩泮水閟宮
二章連屬相次其美鸞旂芹藻昭教士德音而必稱之以永錫
難老閟宮四章曰俾爾壽而臧又曰三壽作朋五章曰俾爾壽
而富又曰壽胥與試又曰眉壽無有害其第七章曰眉壽保魯
兼之曰令妻壽母言壽之多凡七見復沓而不覺其冗其時魯
公魯侯豈必已臻耄耄乃致是稱願也乎蓋魯公有濟濟多士
之盛克廣德心魯侯則以一身一家備集燕喜而大夫庶士莫
不宜夫是以錫嘏受祉與泮水所稱敬德求祐者烝皇媿美昌

熾攸同有餘冀焉今公之治平郡年豐而民氣淳學立而人才奮日與牧令諸君講求報稱悉心撫綏暇輒將祿養於高堂協主饋於中壺康強之吉本諸身以宜其家視詩詞之侈皆有實行可書然則論公爲政之賢與夫夫人相莊之樂者將歲歲爲公壽之不徒以是文也牧令諸君忻然曰善公之言質請以黃華之節書於屏而張之

妻叔母黃太夫人七袞壽序

誼之親者言必質以言壽人且以言壽於親之母彼徒工鞿悅於誼何遠哉余之壻於贈尚書李恭毅公當公開府嶺南猶子松華君適校祕書在京師爰爲主盟將禮於余則內兄行也頻年同官於朝戚愛相洽如手足間與詠懷將母輒有三釜謀養

之思辛亥夏君外選韶之曲江令蹤跡遂睽然而版輿迎侍采
蘭樹諉余知君之報劬勞而介丕祉者允爲心之多所愜也今
年寓書桂林以從姑尊慈黃太夫人九月登七袞屬獻言以稱
壽余曷辭竊還以語松華者上之太夫人以下其慶之洪且遠
焉憶昨壬子歲秋八月十九余陳謝督學粵西之

命蒙

賜對於避暑山莊

恩詢家世餘并及親卹之入仕者謹以妻父某對

上動色曰李某好官非止操守一節其實心任事大臣中不多
得朕方未竟其用今其後人若何有讀書做官者否謹以其子
采蒙

不中列多卷一
恩賜內閣中書許以舉人會試姪樞優貢生蒙

恩授廣東曲江知縣對

上欣然曰李某文章朕未之見他做官好學問必好其子姪能讀書又已做官都是李某教得好李某會做廣東官更爲出力朕時念之不置維時欽問俯伏惶悚顛首中謝

上復稱李某好者數四且以爲

訓場余歸京師述之中書君并縷陳之爲姑陳太夫人七裘勸觴語嶺左右相距邇矣而半載中使傳倭徙猶未得達前言於曲江今欣逢太夫人壽可語松華以

上之眷注先臣者如此期勉後人者如此宜若何感激以圖報國恩若何奮策以內副慈教爲太夫人舞衣增慶也乎至夫母

德之賢昔以婦兼子職繼以母全父道詳於闈學周公所製序
中已爲僚吏士民所周悉然其恩慈訓育松華旣以廉幹契鼎
司將見不數年間如恭毅公之發迹縣令載建節於海南以彰
一門輝映之盛遭際固亦其常又况仲上禮官季注藩佐他日
蟬聯仕路紹起家聲

天子將以眷注其先者復數數眷注於其後爾時松華諸昆奉
太夫人期頤拜

封利壘紫書所謂釐爾士女從以孫子者福誠未有艾瞻彼南
華桂江環之麻姑之蝶翳仙裙紫微之璫彈樂石可以是爲太
夫人晉爵無算而未可以罄太夫人之慶之洪且遠焉余之言
必以質者如此爲誼之親者繫以職任不克遂登堂之私而容

狗與譽之溢乎亦以闡太夫人之教而卜其所爲福云爾

永雨村觀察介壽辭

有爲交夷之言者佰佰什什泉衣屬褻魑結跣踵女買男芸色
愉而中懇貌樸而語真徠于三江之舟筏集於平而水口之鄴
闔樂道其所帶聽於彼旋國之使臣也其言維何云下國嚮風
世世子孫僕隸迨今嗣王惟幼冲國人罔不震恪仰

恩威之赫鴻事有稟令敞關啟也孰首發其蒙歲有職貢朝京
禮也孰作率其恭貨有期會準交市也孰要劑其通或且
詔諭賜之嘉貺賁之使命暨之皆下國之惟恐隕越而孰爲恤
其隱而導其衷蓋聞有

天朝之賢大夫焉厥惟左江備兵永公則又有爲緬夷之言者

曰永公昔來兮緬人服永公至止兮緬人熟便居隨朝儼班屬
孟五還俘復邦族蠻蕃弛禁生計足緬人安定遲人陸花象我
峩金塔轟自公歸兮膜拜祝長思公兮往且復翎翠煒煌豸冠
肅須眉春風粲可矚緬人誦公如誦佛長生極貴多壽福聞斯
二說者謂爲知永公謂遂足以徵公之建樹非常卜公之壽而
臧熾而昌爲邦家之光固也竊以爲未展其說之長爾座上有
客輒然而笑謂子迂哉蓋各善禱余乃斂容正襟揖公而告曰
公不嘗爲余述先德之廔廔乎蔽芾甘棠召伯所憩中丞公之
遺惠也焉得設草言樹之背太夫人之遺愛也芄蘭枝葉伊童
年是佩勿熊之丸而勲勲于鯉之對以燕之翼而翩翩于鴻之
序乙科肇雋聿在壬申之歲迺揚駿烈迺策遠名直中書省黃

麻六經衍國語之清媿工譯書之紛綸同文三合字母訂音今
雖遠宦有年而每對于

天廷若都俞吁咈之日夕承也自其起家令牧赤緊三輔公嘗
自云吏有師法匪惟守中丞公之傳兼得南州李恭毅公之治
譜衛河清流薊門烟樹片言折獄萬家乳哺察民之疾苦同民
之好惡此之謂民之父母三載考績書上上以聞擢爲星郎小
司徒掌國度支而衡其均試外知臨安郡良二千石績用克循
伊瀆之民福何厚伊公之福瀆民澤何久十有三年擅老守歲
歲焚香拜童叟公勿去瀆瀆民歌也思民之戀公弗釋

聖天子知之賜官一階爵一級俾卽於瀆職惟糧儲爾司藩宣
爾攸攝臬事爾陳時以繫民瘼無一日離載駸駸乎周紀以爲

期矣夫前者阿瓦之宜封曠典也公則命崇其所專今者鎮南之帥牧重寄也公則

恩優于所遷誠以開敏宏達之才益以老成諳練之識體用賅備濟時稱賢瀆無異于粵也粵亦何間于滇如是焉乃足資倚毗于重邊至夫綱紀郡邑拊循漢彝租調有督監卡有譏簡牘務覈警巡弗弛出則據鞍矍鑠揚旃葳蕤入則椽燭閱史彈琴賦詩方當南陬清和百穀豐綏內外安堵民風恬熙

萬年聖神作哲詎從公之優游聊臥治於炎陲已哉且晚下璽書加顯秩登進崇嚮用亟是將繼中丞公而起爲

國宣力爲民布澤大而許身稷卨小亦立功韓范而豈三公九牧之不予遽陟也乎抑聞公之爲人尙風誼好學問執沖和葆

寧靜坐照以知感物以信涉世歷久交無迂情仕進之途屏除
競營平居寡嗜外累莫撓如遊康道坦坦履貞體格剛勁清貧
壽考合乎相經觀省道妙吉祥止止全乎養生緩急安穩得大
自在應乎梵輪有弟一方洮之雲有子萬足餘珠掌擎倚官爲
家百祿膺百福壽增今公位甫監司算才花甲六齡耳
無日家之慶而公堂酌彼觥無日民之頌而僚友嚶厥聲卽他
日交緬之人來享於庭當如北使入朝問文潞公起居安否夫
是之謂不朽之年適以大其不朽之令名也乎上客聞言四座
解頤謂余所陳畧無飾詞公不工飲迭勸一卮謂此長言可書
屏帷歲逢生日張而樂之善道意中哦杜蘇詩乃召宗武衣其
綵衣或拉李生腰笛而吹壘兮壘兮百歲樂兮余與上客咸再

拜起舞而爲公進介壽之辭

九老說

九老說者以壽外嫻之尊封中憲大夫李厚翁九表也按唐書白居易譙九老寫貌合圖其中爲退官爲高隱爲方外各亞品流宋書李昉致相踵其會然皆未登九十以爲好事云爾則以九老序一時羣賢奚不可以九老敘一人之履諸福者乎今將事徵其實樂舉其全裸而衍之繁百而重之難老也而且忘乎其爲老若今厚翁之福之備甚矣就九言九稱老以祈不老請疏其說一曰老而富富古福字從九疇衍福義也翁本讀書寒素自以精心儉德振其家無一毫非分無屑屑錙銖計操督數十年棲於羨裕殆所謂資富能訓惟以永年者翁之備福一也

次老而貴貴者歸也物所歸仰也翁壯志未遂隱德食報拜

詔階四品大夫歸仰於其詒翼由是金紫日遷翁行披一品衣
享人間極貴長生之樂夫非榮之榮者歟翁之備福二也老而
益健康寧也禮九十飲食不離寢有問則就室翁何矍鑠哉恒
居夙興善飯豐頤堅齒屨杖從容猶能目辨夾注然燭作細書
至其綜規家常緘巨就理賓戚揖對語長而意真舉事無忘少
年強記弗逮翁之備福三也迺若老而教成子若孫身名具立
長法曹次金部借諸幼英英上進一副其毅似之勤昨年孫享
預解聯舉進士選翰林金花春宴牙笏蚤朝人靡不爲翁豔之
娛老增算如券在握昌而熾也翁之備福四也且夫老而耽逸
區區寄傲鄉井烟霞濟勝大都山澤癯耳翁滯壯遊入粵家嶺

右如千年遠心恢魏不屬牖戶鹿門耶稚川耶其識地殊超人者春雲伏波之巖秋翠老君之洞往來復輿徘徊乎芝鶴橡猿間塵寰清福百一莫企翁之優游以安其老者五也至夫老而好善積久如一日惟翁持活人心生平拯難恤危難可更僕微特子姓歲寓周助嫻邨交友銜惠徧焉卽如粵西鹽羅翁并課廿餘家市直偶翔亟損算緡籌其便蓋有力十減一入則無力一資十出善如耳鳴已獨知而人不覺翁之至老不少懈者六也知足不辱知止不殆道德五千名言所傳翁也澹泊和易與物無選其性然也每訓誥後以順時惜福長保有餘毋逐利名外誘誠得滿而不溢之旨翁之以令節善其老者七他若高年多爲導引之事熊經鳥伸動引腰體術求長年又或託志梵海

佞事竺尊用希無量修出世種種妄謬佛無是法翁也瀟灑自得
不惑不諂地行天界當前卽是此其無假於卻老而自然克
全其老者八然則頌老之說善矣備矣龐眉梨面之夫得一於
斯已自成其爲一老而翁則一人兼之福猶未有艾生當

聖天子萬萬年國慶家祥爰儲人瑞翁將歲歲率其門內少者
長者繡衣珠串嫋殷翔洋炷香拜舞退而肆筵樂賓什什伍伍
懽歌油然穫稻爲酒以介眉壽十月之吉朝貴憲老羣爲翁籥
豳詎惟九表云乎哉鏗而衍之絜百而重之極太平之盛事此
老而遭逢

壽世之說之九也此就九言九稱老以祈不老先滿百而引其
祝也作九老說

婁母顧太夫人壽序

歲旃蒙單閼之紀

國慶六十年天下仁壽溥邕蕃祉職臣子者類能及其遭逢之盛報最於上而潔養於其家雍容怡和導揚夫

聖天子教孝之隆錫類之厚於時春三月吉封恭人婁母顧太夫人設輓於桂林郡閣蓋年七旬加四矣東憩太守盥爵衣繡歡介糜壽同官濟濟充庭綺裳儻風并頌靡弗以慶太夫人者爲太守榮煒哉乎彤管用斬綽綽禮則宜之每嘗於諮畫政要之餘兼諭夫母德因以知太守之順親悅親承顏有道而太夫人之賢而多祐則誠章嫩之畢宣相推相翼於未艾也太夫人系文學名闕生稟懿粹媿媿愉愉孝友摯於性真歸贈公後公

方以恢闕卓犖之才壯遊秦隴間結納賢士大夫冠蓋切集然
諾償其信施予植其惠太夫人黽勉交贊如瑟中絙珮應環至
今思贈公之賢者輒謂相夫子以克全古道垂令聞實重有賴
其他陰德耳鳴行履綽如已太夫人治家循整合度輯柔內政
經畫分明錡釜筮筐腴畜備縱積久躬飭罔懈馭下務寬恕姑
姆歸戴熱服無雜言其教養所生也爲父爲傳嚴慈互濟叔重
釋母曰牧劬勞長育善導觀成殆有規其大焉者今覘東憩太
守奉慈訓秉貽謀自晉右而粵右歷更劇任所在循勸爛然有
聲歐公之言曰以恭儉均一教誨其子爲賢母又曰見其子之
賢而有立則知其母之義方洵乎其若券而太夫人彌有欲然
于中而不自足者東憩自爲尹丞泊今領符桂筦兼攝醴法觀

察每聞踐一官必申一誠平一獄必加一餐定省之次詢何以圖報稱計何以澤邊阡名義兢兢神明其德而且受鞶褕而母忘布襦備珍膳而不侈鼎膏篝火軒車箴紕蠶績業其素勿少怠廢澹泊之風處貴不踰居尊益謙夫然後顯其親者獲以公私曲盡殫慮於職而訢合於庭幃衍喜之有固然所謂儀者象之善祥者福之善淑者德之善穀者養之善太夫人其綜備之者歟昔虞潭守武昌式訓于母朝命褒之年九十五立養堂丞相以下皆趨拜蔡襄知泉州有惠政仁宗嘉其母賢宜富貴壽考賜冠帔存問母年近百猶聰強弗衰茲東憩策其才誦揚其勛譽走階獵級絜遷有期知不徒以腰笏黃堂矜奉色笑者若太夫人矧算期頤子孫逢吉由此安輿八座積其純德以重荷

不情身卷一
朝廷褒綸慶錫之榮繁二母奚專美之有哉客有述太夫人屆誕前期告東憩之言曰人之生也以仁生日而庖傳牲宰之弗捐曷以稱仁術務止之諄戒至再斯言也得長生識得度生識得無等生生識以是種福廣大利益必多願以五嶺慈雲三江德水護持百千萬億妙蓮華果獻祝須臾洎無量壽緣可乎是爲序

金可齋司空壽序

虞書咨四岳之命帝載首能奮庸周雅介九如之章臣工並俾多福其有躋登華要天文次危東六星運應壽昌老人傍弧南一宿媿庭堅之誕邁種儕容城而竿脩齡依階承蔭紀八千歲爲春秋名世興材符五百年之元會宜也雲開閭闔人忻聽履

俱還界住蓬壺仙與添籙而進慶惟耆喆光我朝英可齋大司
空以浪海之瑤源得崧山之神契國稱君子千餘里夙孕地震
疇訪聖人九五福先探壽筭受姓鰭八音之貴重毓秀稟五行
之正中生當堯醜舜薰之期儲爲稷贊高諧之器芬揚清白吏
是神仙夢賜紫緋位當卿相固已標出羣之風度比玉斯溫布
蚤歲之聲華未春先暖者矣爾其踐資少府視秩望郎殿監掌
諸供奉守在劇曹朝列隸中大夫官殊寄祿冕蟬戟繡騰仕路
之煒煌珂馬籠街遊禁城之詆蕩薛宣材兼數任羣獎上流任
隗治協五工累膺特拜

天子於時眷公勤慈篤公棐忱遷幹才於農部判領度支晉內
職於苑卿甄求將作中臺管轄承對勘於丹墀右省鉤稽奉晨

參於青瑣鸞聯接漢自遂置身鴻毛遇風無非順境爰乃括九州之象邦土榮以正階褒一品之衣國勲加之上爵退朝畫牘官屬謹其承頤計稟程工胥徒公其執役姬涂軌轍增考工記所未書文囿經營續靈臺詩於不日銓員月驗間資選俊之衡漕庾歲登亦藉持平之算蓋惟勵丹衷爲報稱從事獨勞依黼座之

寵光承

顏最近功名猶餘緒耳

朝廷實嘉賴之今夫偉寮采之歸美耳熟經猷躋侍從之清班身兼文學是以華覈光贊時務仍拜東觀詔書蕭瑀典司史裁總擷西清圖籍日翔芝闥縹函次院印之文春滿筠觚青枝啟

閣鈴之祕巾鈔線表程甲乙於寫官翠縷雲摹枿豪芒于柔手
活字則巧聯玉版規矩神明名帖則法仿銀櫃發皇翰墨又或
藝成意契

恩遇心孚排

乾清之寶柱月令裁鏡綯

寧壽之丹楹春風綴繡五雲殿閣霑三爵於落成

萬歲樓臺體

九開之崇儉桃牋徧帖金霏天上之仙權貝葉新緡銅冶佛家
之梵相進珍厨而侍饌梅鼎能調集華宴而分茶栢梁屢和曩
歲扶鳩入席躬陪千叟之筵平明賜騎登

朝人避三公於道才多許借偶兼鑰袋懸魚望重有輝爭睹冠

翎珥翠斯又

新恩舊恩如陽春之吹煦無盡况際

君壽臣壽作元首之喜起載賡也乎是月也雪釀六霰花開五
萼豐狐被澤烘來鵲尾之爐臘愷浮春斟滿螺紋之尊文淵嬰
鏤詎便稱翁安石雍容雅宜作相吉雲門榮瞻甲第之參差香
社風流儼須麋干圖畫重以掖地椒親恭謹過西京七族嵯池
棠愛謳歛在南國萬家兄孔懷而武庫留指樹之遺子象賢而
戎幄專建牙之望江關典鑰筦餘高飲水之名露冕開幢輶傳
布宣風之體誠屬公家之濟美况兼孫行之羅歡一牀笏滿卜
方典未艾之祥百歲觴開登極貴長生之品方且捧珠聯而雲
護仰璇榜於

天題勤恒趨曉

獎茲卮職于冬官澤俾分榮快及履長于春節擣小侯之將校
遠爲汾郡祝延齡帝子之仙漿親與涓陽稱壽茂矣錦屏慶色
朝回預簪組之華琅然鈞曲雅音讌啟奏笙璫之韻從此晉蕃
用錫彌亨接晝之三

福集近光備敷斂時之五樂述德以抒羣志歲紀大年願純嘏
之昇爾常辭諧善頌

常將軍八十壽序

生崧篤申甫介

天子壽萬年咨岳盛夔龍作秩宗典三禮蓋惟星垣燭采塵環
斗北之尊珠極凝輝座拱弧南之老闡鴻儀於熙代洽燕譽以

綏祗依階承蔭願紀八千歲春秋名世與材聿符五百年元會
是以雲聯閭闔人忻聽履借來界朗蓬壺仙與添籌而進慶登
霄詰榮溢朝班凌齋大宗伯紳黻名家鼎鐘茂族生秉神契旗
鈴芴帑之祥代行達官冕蟬戟繡之澤際星景而雲慶瑞咸覩
爲鳳麟抱武緯與文經貴合兼夫將相固已標軼羣之才品比
玉斯溫揚蚤歲之聲華未春先暖者矣爾其壯干城之選登執
戟之班龍驤翼衛內司中壘步兵虎旅奮揚外轄雒陽部尉四
年綰鑰慎巡警以宣風八色分旗統佐參而隸屬遂帑符於熊
嶺風清上帥之轅並樹節於豐原雲擁將軍之纛重以西安左
翊韓愈上都統相公之詩朔鎮連城陸贄草檢校諸軍之制智
名勇功需衆美之擅節制號令仗維翰之英十閱春秋四移麾

鉞邊隅幕府鞏千里之墉隍舊日汗封理萬家之游牧運籌而
謀猷先定當軸則經畫老成允宜印綬生光數被

璽書加獎行年七十拜

命九重西湖坐鎮節樓欄兩湖之雄南國元戎鼓吹導八閩之
盛佇麟圖之列像特著威名適鴻翁之遇風無非順境時也

帝嘉迺丕績遷重任于封圻公篤將聚忱矢專心于控馭山川
禹會令行越絕之區風土職方俗詢甌東之遠芾棠汝吏飫粟
我民何意七鯤浪沸傳小警於滄溟亟圖百雉城堅固羣心爲
保障賴厯籌于

軒策速成洗甲之功荷

錫命于楚疆更畀建牙之寄

不情卷之二
天真寬大渥雨露以頻施

恩用申重閱星霜而內授爰乃階茲會府擢在容臺春官六十
立之長以維專曲禮三千待其人而後舉太常典樂兼叶節韶
豕宰討官間參衡鏡才多許借領鑰管以懸魚望久彌崇曳冠
翎而耀翠巖歲扶鳩毀鑠預

彤墀千叟之筵週年

賜騎從容免耆臣五更之直斯又丹衷報稱遭遇多榮

黼座光華因依不盡者也茲屆宴近龍山圖增香社魏公晚節
最愛秋容潞國勲名恰登上壽十洲客至翔芝蓋以環庭百歲
觴開採黃花而汎酌影綴華緒綵世臚歡舞彩官袍盈階濟美
矧乃捧珠函而雲護仰璇榜於

天題

瓊綸煥彩光贊夫惟清惟寅

畫祿覃禧

恩周夫以引以翼茂矣錦屏慶色朝回集簪組之華琅然鈞曲
雅音譙啟聽笙璈之韻從此晉蕃用錫亨符接畫之三
福輯近光備敷斂時之五樂陳善頌多益大年

浙江顧修浦廉訪祖母劉太夫人八十壽序

受茲福于王母占晉六二貞吉之爻爲此酒以介眉叶幽十月
小春之候官佩璽書嚴重風清越絕之山川家承輿綵歡榮慶
奉萊衣之拜舞益以貴而多壽眼前看式穀之詒慈則徵祥膝
下賀重闈之祉

天全祿養快昨年遷泐之

新恩臣表私情無如是報劉之寵格羨公堂之躋彼陳善頌有
進焉太夫人毓粹名宗惇儀中壺淑慎柔嘉之則康強逢吉之
同溯前此五十餘載持門莫殫其賢稱逮今茲八表介齡美報
若操其先券伊惟茶心耐苦拮据成家室良謀用能蔗境回甜
老壽拜

朝廷異數欲寫祝延之悃試臚就養之方鋪觀令孫修浦廉使
之奉太夫人者小山香粟才傳通勝之英一紙泥金遂報聯科
之捷觀政度支之署勤儉直於青縑典司會計之條特馳譽于
粉闥亟以宗元卿之在遠心戀含飴范伯孫之成人懷藏賜視
事姑魚饌疇分母氏之辛勞繼世鸞封少効兒家之報答江船

春水蚤教蘭舫迎來燕市軟塵遞向槐街僦住每促脂車待漏
趨承對揖之班常因退食舉帷跪進問安之膳優游官舍分甘
則顧而樂之遷轉山郎當職之望斯著矣爾乃院封考課邁三
載之陟明名剡奏牋預

九重之簡僇屬鄙延之左轄理劇需才尋陝號之分祠膺除試
外雁銜按部輝連郡邑之福星馳馬巡方樂煦庭闈之愛景芬
揚鄩社砌依慈竹之春高挹華峯閣擁嶽蓮之秀正喜秦川秉
節差逾潘岳之昇輕軒不圖上黨移旌又效崔邠之導鼓吹煌
煌憲府開錦幄以承顏肅肅外臺襲繡衣而稟令勛勤敬者在
公匪懈問平反而色喜可知于時

帝眷嘉猷

詔俞請親剖黔西之竹由來使不拘方菽堂北之護遑計道之云遠乃荷

天慈之存問爰及家人兼諭太母之恩勤慶餘老福義方垂後撫子孽孫遜之皆賢人瑞實繁縵曾增元懸而親見特廣

聖人之孝治

褒以溫言曲全臣子之隱私移諸近地自此臨安山色迎翠幃以偕來竺岫潮音讚梵螺于無量其爲慶也曷有艾歟茲者民和歲豐之會頌介宜年湖光嵐靄之間堂開有美展千春之籙西池勝戴鸞釵披一品之衣南國祥凝輦錦滿前蘭玉列侍而晚景堪娛不老瓊丹駐顏則長生共卜曾預留賓之席聽珩瑀之鏘然言懷拜母之堂譜琅璈之鏗爾願衍百齡之歲月

寵洽丹綸佇登八座之起居輝增彤史夫豈特企餘杭阿姥舉
桃尊而勸壽觴集天台九真獻芝筐而鞠仙袂也乎

宋梅生觀察暨德配彭淑人六十雙壽序

九日展重陽有歸來之元亮一家聯上第其最少者子由壽考
文章江山英傑人惟盛德及物天將美意延年吾黨方篤於氣
求古道曷忘其心祝夫六十非老恒言不稱八千爲秋寓意攸
屬則夫抱景特立葆沖自怡準此長生宜之善頌吾欲擊芝在
手插菊滿頭及初度之佳辰晉百觴而起舞焉惟梅生先生以
道光二年九秋旣望六甲始周頎然而鶴儀倣乎其驥志自先
生之楹訓作童子以門至生孕尋陽九派之澄幼瀝華林一峯
之秀臯比側坐陳俎豆以爲嬉脈望晨遊展衣冠而必謹兄弟

朋友父子師生學蚤富於垂髫文輒驚於巨眼韶華甫冠博士
一軍明年蟾皎於桂宮再試馬飛於杏苑科目儒流之盛神仙
物望之歸厥有自來良足多已當日

殿頭策對謂宜參禮樂之班爾其邦掌贊襄何待讓夔龍之席
論者或以此才可惜不貢玉堂豈知小相願爲先端章甫若其
文之炳也則又榮莫大焉初履儀曹兼趨書局一个郎官之宿
三能太史之星闕

御沼於文源近仙壺之丹地落葉掃宇宵分太乙之藜香芸發
函日供上清之茗程功斯速補讀皆奇藉殫稽古之勤旋奏歸
昌之律乾隆五十五年恭逢

軒紀耄徵嘉慶元年疊遣

堯庭禪授

太皇普蒼生錫福獻謨者稱聖且神

上帝褒江右多才第頌者唯吾與爾十人拜賚兩度宣

恩側聆百韻之九言增衍

十全於衆說聽承

君賜凡間之錦織難工攜到臣家天上之鑪香未散遂預紬夫
鴻典適共筆於皐生而先生於大禮大文百奏百牘莫不新其
手稟因而光以頭銜南宮之瓠爵纔鑿西府之神輿待駕自此
功名路遠詎矜華國之遭逢姓字屏登矜錄酬知之事業矣越
四年之春

膺皇親政簡往四川以道府補用重其能也藉其任也先朝之

器蘇軾元是奇才大廷之用弱翁觀其治績會蜀烽之颺警指
嚴道以星馳三寸管磨盾從戎五十萬緹箱入谷假便宜而行
事仗忠信以服人剋日平羌經年借寇拊契侯之遺種鏹斗無
驚布夜郎之春風繪帛如約兩字郁鄂之壘雙姓鬱姑之臺太
守之化若神君子之居何陋尋轉漢嘉之旆肇開周武之堰政
令一新風移七屬正以刀耕火耨民氣大和哉其雀瓦鼠墉訟
庭息事召健爲之文學澤廣書堂得草元之先生創修圖誌俄
而大我邊卡卜猥狂蠶手畫事平面稽

天若上官交章而薦諸蕃堅臥於輟膽懼在威實靡不心傾在
德也自君出矣我公歸兮活人無算指囷聽有噴之聲造士多
方列席起如翬之舍大抵微西請吏審文通武達之交需從來

嶺外界夷防山鬼木郎之竊發先生一持以鎮靜並示以綏懷
論功則十級頻加敘俸已八年於外遠攜土目貢香花蠶鼓以
來朝匍祝

金階慰捧日瞻雲之夙願溫辭稱

旨重寄行膺其孰不望以封圻登之岳牧者爰乃山國旄節日
邊

聖書許辭荔支之樓俾遷桂林之轄四郡輝其英蕩百蠻熟其
車軺巡方所屆職兼舉於行離臬事時陳寃一空於洗獄蓋先
生秉和易之性敷明達之猷墨吏暗懾其神明赤子爭仰之父
母是以刻書第一考政最垂廿年賢勞久而圖報心長閭厯深
而希榮品異者也嘗聞木曰曲直不以彗弓而改柔風有去來

肯爲仄帆而競進與其躡強臺而終愁卻步何如斂倦翼而弗
昧識機且何官不有替人况此事當思爛熟南國之棠久陰付
諸遺愛西江之水一碧趁好還鄉屢勉乎侶同心之淑人頡頏
兮願傳經之令子歸裝瑟縮鬱林之片石曾無晚景清娛交阻
之丹砂安用此詎非出處進退之有道交游親戚所共稱者乎
今也鴛魚結伴恰占東湖之東猿鶴移文漫詡北山之北所居
未妨近市一帶街長得歸何必有田雙匙飯煖縱譚典實如陪
古之賢人倡導義風斯友鄉之善士莫謂門原太冷師陋束脩
之羊須知兒復能廉母卻封書之鮮于季則工文著譽藥榜占
祥諸孫亦接武駢英萊衣絢綵人生行樂耳喜春秋之多佳小
子何述焉值千支之環匝耻爲諛語證在素心望鑑峯之面目

擬邀竹節之筇慕鐵石之心腸更勸梅花之酒願先生齊眉濃
笑與衆賓拍掌大呼紫雲長駐添注中壽上壽之經青鳥並飛
高歌偕老難老之什

阿雲巖館師八十壽集千字文

南極星明珠衡曜正霄漢翔暉陰陽幹運厥鍾賢佐荷
天寵命鈞宰調和羽儀表盛受

皇多祐

萬福積餘推及臣下沛施攸殊志切臯禹時會唐虞伊鈞磻者
猶難比諸雲巖相公國之元老
龍飛首歲登朝最早再歷丙辰

嘉慶建號綺甲周八年高德劭自少發跡樹植槐庭詩禮胎淑

孝廉俊聲委宇澄篤才矩從橫始踐仕籍已振佳稱近聆
絲言洞習機務豫章察使秉節攝屬改任尋歸鳳池故步陟在
列卿工垂匡助猷爲所達出制分營條枝漠外遊牧其興
敕移定遠居守遙臨日招遼邈欲釋困顛短扇涼清

寫念寓情事存規則庶席又寧農父場畝丁男莊野市犢勸穡
驅驅杷稼口糧給稅菽晝紡夜飫膳充眠疲離蓋寡戶宅綏讓
幸遵

王化遐荒并壹的收堅昆筈矢抽射黍芒雨紛空同劔嘯目宿
駒食環逼惶懼終罔躍垣股投貢遣默克都丸水皆東面銘勒
蒙崑於彼西川羌兒倣起本隸上渠聽辱盜匪隱唱禍基伯兄
叔弟冥寂晦靈柩敢抗巨林漆莽墨木城薄恃奄誅令隨嚴催

牒紙用兵神妙獨煩勉慮謂資驥力必獲鞠罪勿輕俯納頓頽
伏耳湯熱肥烹嘗我火器轉經樓廟傍覆旻毀赤毛骸斬賤妾
索背母姑鬱戚孤弱虧靡禽悲罍弔飄落解委浴暑忘寒盡得
方止聞阿將軍莫不悚畏斯舉威名古誰若是戎績奏可感賴
訓指義車律閏載更夏冬露布續馳祇上

行宮來旋京闕躬履有容入

見帳殿歡對

九重

帝親扶問惠答女庸

手持杯接謙勞成功位超倫等執桓爵封寶石映冠金鱗盤服
兩圓翠飄四氣裳束旣約黃帶亦騰逸足鼓吹競鳴俠觀輦轂

盈海竟宙褐摩碑讀

紫光壁滿累次貌形

御筆作讚鑒茲忠誠晉大學士宜侍

武英領

文淵職道義熟精青松岱嶽特立眞榮內直端謹

書帷師傅典率史官仙宗策府笙瑟墳簡絃牀商呂承平安閒
瞻想纓組嗣辦甘省田洪草賊翳巖藏谷霸據何物愚別舊新
叛卽捕滅鷓傷杳寐羸駭縻結易幾取芥批根翦葉秦民息驚
蘭州郡邑駕云往迴路引輜軻潔祀沈祭宣房治河審地卑廣
寸尺弗過魚夫鴈婦寥散傾頗籃盞雞茶藜夕糠磨號亭薪寒
楚阜岡羅去以棠說溫飽並歌愛也蒸黎育乎樂利孔孟脩途

稷尹實濟鉅業良哉致

君密邇每與論思信維政體知人殆詳潛燭妍照涇渭二流虛
綠曲巧黜垢厭浮杜弊貞操銀箱紉染鹹恥糟陋肆慎五刑慈
懷求要戒甚處疑谿刻恐效象逐亡羊腸惻飢鳥嘖感孰通仁
能惡好陶養益性矯俗耽善動靜優焉此中恬淡嵇阮翫譏韓
魏馨晚非慕洛圖且似絳縣退食羔素逍疏弁巾左徘徊右囊
畫理琴矜伐謝誚謙吉盟箴凌霜白髮拱

日丹心曠眺園梧月初生魏華且適當深秋景色法酒彫飯筵
張坐設恒沙因果稽拜羣悅被

賞煌煒

字懸絜楹合璧如意無量禪尊衣綵朗麗連璣聚珍仰惟

聖主實康乃身子舍嫡傳惇睦啟後世家具美侈談李趙升造
陞廊桐階綿茂玉堂富貴顧而欣笑夙陪賓友交集門牆語豈
假譽辭異陳常竭微恭敬詠雅音長永增百祿願奉千觴

百鞠溪節使七十壽集千字文

代

嘉慶丙子孟夏月初我百中堂合南極圖環甲增九牒閨積餘
臣拜臯稷

帝光唐虞

盛世調燭泰宇澄珠琴音松殿笙詠岡梧英賢佐運篤祐騰譽
眞靈位業妙讚仙乎公本張星璣衡煒象正黃漢軍右宗推仰
詩書門牆禮義帷帳接武家規早洪器量受知

高皇秉訓

聖上體

國猷爲盈庭拱讓朝野同聲文章宰相倣始通籍厥歲指辰藝
林聚俊稽古逸倫絲竹墳索碑碣周秦西園染墨東壁席珍尋
轉法從霜府威新靡假給辨伏闕何云玉尺嘗持輕羸絳轂晉
號遙臨士必興學稅駕

陪京勉茲尹牧疏其化理歸于親睦

簡在維殷恭承祇若廉使潔躬方伯率屬誠切肥囊箴傳寡欲
是處棠陰父母亭育惠及遐宙乃登四嶽歷詳治績煌發鉅觀
又遠宅邇獨任所難楚阿蘭紫岱岫雲礪雨涼曦熱浴暑凌寒
頗柰勞殆羌厭逍閒仕止隨宜孰貽欣戚傳致疑似微招毀黜
涇渭攸殊過也屏食叔夜步兵稽阮寧逸

離照懸明謙卑終吉幸奉

鈞陶璇霄出入亦列卿垣典賓斯設改踐外僚庶政具攝民物
既綏馳驅盡竭海盜驚投聞諸二廣赤髮漆身霸據愚罔精夫
肆橫巨戎逼莽會匪續盟根依枝傍下令水師斬禽首抗筭矢
火丸顧射寥曠寐悔顛輒虧覆背忘分別遣逐姑舍已往鳥語
黎人俠路頓顛糧飢農莊布綿機紡羔犢池眠鷓雞市唱銘勒
退之摩空曜朗嗣聆

內召志結堅白淑問刑條端矩讀律罪隸鈞虛絜彼故習畫形
刻桐如傷鬱戚曲沛

湯仁動多解釋左都御史神羊特立槐面陞廊翠聽履迹龍納
王言謂資匡益節制尊嚴用女成策定靜安慮郡縣城邑耳目

惶駭禍基竟息建康近事滅叛和州隱辭散紙杳漠誅求垢藏
嫡妾妍辱俳優密捕將弁熟審軻轄羅縻罟困劔嘯腸抽弔邨
魄落鳴的骸收亡易翦芥紛且批浮扇清冥惡扶植弱流慈悲
恐悚

敕謹禪修信有因果廟鼓經樓寸誠對

君默起奏草敢恃才大非矜性矯無地自容惟

天可表八字孤忠平生直道

丹筆垂答實感再造豈弗畏譏焉能取巧絃瑟糟牀綺紈箱寶
居貞盤桓慎幾嘖笑充養淡薄恥營溫飽氣寂金銀守素敦操
杜弊去甚懼緣俗諺日者振荒誰惻疲賤五行賊木衣薪烹飯
凋穡委田磨糠短膳賴此翰迴富皆好善舊冬實畝黍稷獲萬

河渠重務莫侈遊談要工洞察比戶移瞻吹沙塞口伐石烝巖
每煩庸力并集丁男魚兄雁婦露宿飢飡手畫把土色茶傾籃
車驢糞束晷夕催奄猶存省約勿坐翫耽川途利達輦引場鹹
宣房舉效禹貢遵恬祀謝沈祭俯助淵潛

茂賞論功元老劭德載與

榮施

主心鑒悅歌曰良哉青官領職裳服飛鱗爵超執壁孔翠兩圓
羽儀作則李趙以來更得伊說鞠溪稱號想見雅懷洛陽韓魏
聲滿秋階情歡貌樂甘谷讌杯豫思晚景巾帶翔徊最愛佳兒
少而卽貴敬念

命名長年寓意組綵飄纓崑暉映麗被

寵異常陞官不次駒足姿驥鳳毛美濟累業冠蓋克孝永世弟
荷深交夙連昆友適當華旦眺慕鍾阜競寫楹牋並陳蒙陋願
隲侍筵福祿啟後壹等陟封千觴勸酒

阿厚葺齋使六十壽集千字文

星瞻南極律中林鍾招涼扇羽解暑絃桐又恬有象富庶可封
禹臯伊且虞夏黃農大僚化美外府資充履綏增祐拜慶攸同
稱觴致敬直指阿公爲讚令辰約談實事舊隸從龍遙宗宅沛
積善之家敦睦嗣世

公籍正白旗漢軍本姓劉氏世稱劉善人家

天祿曜芒絳縣牋

字

乙亥

茲適丙垣周甲過二既益長年必高爵位歷念厥初耳

聞頗熟尊嚴見背兩月方育雁杳兄終鴟傷婦獨飄髮懸鈞得
男願足傳嫡基綿永貽似續

贈公兄弟相繼卽世身後始得公以傳

賴此孤兒慈

帷愛鞠故宇逍寥短牀顧覆寓成浮居

公生未百日以居宅無依從太夫人寄處外家

夔書飽讀紡壁箴箱糠食藜宿蠶性溫迴筍根姿束少也賤焉

轉瀾成福筆赤當官

公年十六選筆帖式筆赤本元史

微階始屬雞唱習勞仕

忘卑辱且嘗薄飯姑安毀服疲困駒驢潔謝羔犢懼誠畏譏理

身離俗恐卽翫耽恥云競逐尋達

帝聽表女貞淑賢於商母

義畫照燭

乾隆庚子請旌賢於商母四字扁額

特賜

榮感

主知矢乃誠篤弱冠矯騰樂相推轂據陳最績匪鈞譽聲去糟

磨垢落涓橫涇英光倂起累職再陞

屢以京察一等選擢內果務府郎中兼佐領叅領

蒙

鑒賞軍機奏名

嘉慶戊午名遇有織造關差題奏

旨命軍機記

楚州稅駕

使命執衡

授淮關監督

謹若收納絜彼虧盈敢緣隱射駭悚沈冥任

滿入對

訓語面聆伺翔委重超陟內卿

擢奉宸苑卿

敕攝觀察四郡黎烝

命以三品銜攝廣饒九南兵備道管理九江關監督兼司審務

牧伯尹

宰動佐政刑匡嶽秋朗康谷冬凌抽分殊則誅索勿輕斬薪伐
木短尺量平景德陶器巧造宜并陋規盡黜水利亦興止禽劭
稽逼賊操兵棠陰黍雨俳詠琴笙因能易地

簡調羊城

乙丑調粵海關監督

海東下國叛滅盜寧泰西日本莽路沙更

輒顛鬱晦岫辰溪澄駕空竟宙魚鳥無驚丸瑟璣組魄寶川靈
火紈羌布昆劍盤纓都籃浴漆戎絲凋盛遐邇臣妾躡顙投盟
衣珍夜市物肆驅行廉靜正已寂寞寡營自踐要途處懷退讓

密

召飛馳

鳳閣歸仰夙夕思親力求躬養

丁卯陸見後
乞留京侍養

勉膳問眠清寒

靡曠論武左驥威桓別將

遷護軍
統領

國領

圓明拱侍

輦帳巖翠湯丹

璇庭步廣

兼管三
山事務

禪悅雲樓仙眞霄抗奈何不弔寸草傾暉音

容寐想感貌潛悲存亡罔間孝竭忠移義深

君父惶答

仁施輜車早遣

王言如絲曰惟傳說信用其誰五省作賊上煩

淵慮

命巡視兩淮鹽政

淡食枝梧甘和厭飫玉色霜妍野田出素引目

疏通邑亭場戶弊假紛批侈幾欲杜甚惡烹肥游民翦捕曲體

羣情幹稽運務鉅萬金銀息餘給助是謂濟時蓋取諸豫往者

恭勒

皇朝石經

先是充石經館提調五載厥功

稷奄圖策孔孟心精宮牆畫

幸釋菜祭丁碣摩甃鼓碑寫韓銘羸糜堅軻鱗列俠楹環池紙

染妙墨古馨秦晉漢魏晚近莫京比奉

特交李唐巨籍史誦霸閏把羅散逸千牒傍連綺章詩集壹遵

御定率工聚刻

顏刻欽定全唐文一千卷

煌乎麗哉隨珠越璧雅好席賓

手扶士氣所在建學優禮師弟弁帶巾裳典墳道藝紫陽結洞

白毛獸異茂叔眺洛蘭畝青意八百號舍猶慕遠惠

初建淮關天津書院

繼脩南康鹿洞書院九江瀟溪書院及臨斯土實新條制又于廣州增建貢院號舍八百間聖

廟祇脩貴神並祀茲揚後敬修文廟貢舉多才登俊以次親

安定梅花及廣陵樂儀諸洪發殿元接跡廊陛已已洪君瑩大

書院增會文堂專課孝廉魁後近科如探

花伍君長華會元聖君九載而來吹植歡被維我夫子歆守端

良河渠功煒的慎宣房頻年督濬鹽河籌糶義倉賑濟飢民諸

漕船驗收工並節流塞口設法催糧葉藏露稼饑測振荒罪

疑孰辨審改矜詳每垂

嘉與節次 恩旨 嘉獎優敘治具克張形骸弗殆顰笑皆莊默辭駢芥恃

秉熱腸鳴謙獲吉志

寵非常生等庸愚伏承坐右岱立邇儀崑虛俯受佳譙陪筵欣

切岡阜松磻難老槐映啟後豈效嘯歌嵇倫阮友持竹葉杯歡

荷華酒合會文堂門人頽首

時予主講會
文代諸生作

永觀察宣封緬甸記後序

敕使今廣西左江道永公前督雲南糧儲日以乾隆五十五年
庚戌夏五月奉

命封緬甸國長孟隕爲王外臣充使敷宣

天子威德於萬里之外選重而體尊任專而遇厚自馳驅而詠
謀詢度悉於公所自記之文余更以得諸史館聞見之詳恭讀
御製詩章之至大且備爲公繹而序之蓋緬國之歸順也不加
征自徠服與他國異其奉表納款始於戊申之春距己丑班師
越廿載議者或以夷性多疑未敢遽示之以信而

天子神智所燭不冒同之一聞督臣奏入旋降

俞音且深

鑒其家庭構衅之由國人擇親擁戴之實與彼遠服憑藉寵靈
綏土保民之至計於是乎前此有

獎諭之詔有緬甸稱臣進貢誌事暨

賜宴緬甸陪臣卽席二詩納之以字小之仁而實準之以制事
之義

天度汪洋誠愛孚格萬萬非俘致招來之術所可同日語者隕
旣受

詔矣受

賜矣結寸心之感如蠚斯附如螫斯振彌不容已聞

大皇帝八旬萬壽歡喜祝釐爰復遣使叩覲曲獻願懇當是時

隕知銜

君之恩綸

國之慶而我

皇上特躬示以老謀壯決之要

心厪其睦鄰固圉之圖

封之錫之

予之敕以崇命令

寵之詩以垂告誡遴信臣親齎以授此永公之使所爲宣

上德而慰下情綦有賴焉矣乎今天下職監司者析其掌曰守
日巡綜其紀爲督理爲整飭爲撫字常員八十有七各循其所
建樹要不過按部方隅之內已耳又朝典封外國使以貳由禮

臣列京朝官請

命得對後行邇年四裔賓服咸欽頌

福疇斂敷無遠弗屆

天子嘉惠羣藩過封賞大禮率因其地之密近便於速達而又資其人之熟練易於周知惟恐佇恩者之延跂稽時如永公者官則外臣守則內地勿拘拘成格以遣一旦爲

天子使皇皇者華翼龍旌以載塗召象胥而通譯自騰越發軔不兩月至九鈕之城陸則有鐵壁關之除道也洗帕河之治橋梁肅館宇也新街之彩棚綺飾奔走而祇迓也水則有戛鳩江之望祭登臚王子王臣之引纜前導也碎木峽錫牙情之香花塗塙潔坐擺而修慶讚也於戲偉哉王之身若子及其臣民小

大稽首郊迎戢戢方將拜公顏色倅然沐春日之溫望公容止
進退肅然仰豸繡之凝霜冠翎之耀翠聆公壘壘言論婉曲開
諭不知其若何睢盱而笑呶嗚而互相告語以爲

天子神聖假非常之寵命於公而公執事來臨其和易也有節
其嚴重也有體爲炎陬小部之所見未見而聞未聞也者禮成
王乞准嵩使入謝公載伴送詣

闕敬埃

清問奏輒稱

旨

天子將嘉其才績而大用之公乃備書往還所事記之以不忘
其遇而非徒爲專對不辱幸焉越年公遷左江余按文桂廣適

讀其文慨然於古所稱使絕域者可爲將相同科蓋兢兢乎使臣之重若此序其所弗能自道而以

恩敕

御詩莊錄於前公與余文並系於後俾覽者知公爲

天子所信爲外夷所敬其倚毗有殷然者他日領封圻躋岳牧公之本鴻猷以篤承

暹眷胥於此焉卜之則豈惟行邁之光華爲足增耀於唐驟漢揮之地云爾哉

重建曇陽恬澹觀記

事有明網常衛正道顯晦殊數不能不俟之時者天道若不可知神者鑒其將來而太虛之中安於無爲隨所出入而勿之異

察理者明辨而力挽之又得二三扶世賢人爲之發其微而振其墜先後之際實重有賴焉耳矣明太倉王太傅文肅公錫爵第二女子曰曇陽大師者從其道名名之生嘉靖戊午稍長字徐未嫁而徐天師故貴家念父母不獲死幼齋薰奉大士謹遂解兩蔽得元門祕籙至是肩修益厲三示節而乃成終以萬曆八年九月九日化去詳尙書王公世貞所爲傳先是其父與世貞里交密築室城西南隅同力于道師爲揭其要旨曰曇陽恬澹觀蛻從昇龕其中觀之名繇是歲月旣塵不幸爲土人堙溷載乘失考併其事不傳有心者惜之歎純節大孝之不彰于時而悟性致命者之謬爲後來影響破毀至於沈鷺不挾如此極也今年夏子偶留此土聞州守于公方輯州志薌其奇節訪觀

舊址相與經始移建尙書祠左夷考事實以州舉人馮君某所藏世貞傳畧及今尙書朱公題語爲斷而州翰林汪公重以一時獻章所系如師之煌煌名義卒以成就無上爲萬不可畧有舛遺往復論定言于守而備登之復借羣士綜曇陽徵信錄以爲闡幽垂世之本善乎行義必有助而心理之公豪釐印證爲矜慎之靡不至也師之化也嘗曰乘理而來乘理而去則三化一是其有功倫物迹不涉于詭幻正自有辨不然者神仙何與人事當其時言者撓之委巷播聞又詆甚而熒侮之傳之寔久世且以壺闔無徵等諸荒唐之說棄置弗道抑誠大可憾者師固不以是增減天道夫豈終泯歟爲天下事者方將出己見以提挈一世表章千古以排衆喙之無定况于前之人有言之者

而不汲汲乎矧其視聽暢其潛隱莫存其人于不滅何其漠然于綱常之大而又罔知尊信正道啟門戶之疑徒使無識者之駭其情刺其虛妄也哉人知神之神不知不神之所以神人以奇期聖我以不奇期聖曇陽杳矣斯觀之新匪特諸大夫君子之力卽謂二百年貞靈之感有以默成之也夫誰曰不宜

萍邑興賢莊記

江右古風積祠穀伏試士以勵其家之讀書人俾服習名教恒沐衣冠禮義之澤向已然不能戶立祠祠殖產也吾萍自嘉慶辛酉廟祀

文昌帝君於邑中慕義者卽其旁舍爲興賢堂十鄉之人子若孫及身及女士爭出田穀金錢納於衆於是有興賢莊之設歲

取租息供童子三試卷冊費諸生鄉試諸貢朝考費已舉士上
春官計借費皆先事爲之備掄元掇鼎之祥則厚爲賀而費之
而又專歲入租期之踵接以示優異益以勵其鄉之讀書人敦
尚名節小而表儀膠序大而登進爲公卿大夫率由茲選近科
萍人領省解者連獲其三繼此巍然大魁必更有好修奮起之
彥大昌吾邑之文明可操券俟者堂後各祀其先迺毋忘本始
之義亦足以矜式後賢洵可風也夫士之取科第如探筭焉知
誰得則此千百之繫於鉢粟邊計其爲誰而爲之無所爲而爲
爲公心又安有不當得而得爲僥幸者此其間殆有神相之歟
逸史稱隋末一書生所居抵官庫有數萬錢欲取之神人訶止
曰此尉遲公錢也可知予奪之權默默中非人所喻充是心以

粹志功名必能窮不爲貧移達不爲利祿疚力扶世道人心之
正仰副

朝廷造士之隆奚止爲吾邑幸哉若夫條畫之善一以鄉之子
姓筭其贏縮請諸有司而吏胥莫能持公諸舊家而異籍無敢
溷普惠寒峻推廣

皇仁庶乎於學校人才不無輔翼之助故樂聞其事而書之是
莊計穀■千■百石錢若干緡載在圖冊碑撫並書以垂久遠
道光三年歲次癸未仲春月記

个園記

廣陵甲第園林之盛久冠東南士大夫席其先澤家治一區四
時花木容與文譙周旋莫不取適于其中仁宅禮門之道何坦

乎其無不自得也。个園者本壽芝園舊址，主人闢而新之，堂皇翼翼，曲廊邃宇，周以虛檻，敞以層樓，疊石爲小山，通泉爲平池，綠蘿裊烟，而依迴嘉樹，翳晴而翦，勺幽爽深靚，各極其致。以其目營心構，之所得不出戶，而壺天自春，塵馬皆息，於是娛情陔養，授經庭過，暇肅賓客，幽賞與共，雍雍藹藹，善氣積而和風迎焉。土人性愛竹，蓋以竹本固，君子見其本則思樹德之先，沃其根，竹心虛，君子觀其心則思應用之務，宏其量至夫體直而節貞，則立身砥行之攸繫者，實大且遠，豈獨冬青夏彩，玉潤碧鮮，著斯州篠簜之美云爾哉。主人爰稱曰：个園園之中，珍卉叢生，隨候異色，物象意趣，遠勝于子山所云，欹側八九丈，從斜數十步，榆柳兩三行，梨桃百餘樹者。主人好其所樂，其所樂出其

才華以與時濟順其燕息以獲身潤厚其基福以逮室家孫子之悠久咸宜吾將爲君詠樂彼之園矣嘉慶戊寅中秋記

石竹堂畫像記

先生和易博達人也學以誠身爲本以知進退爲用性情所發文亦如之自少處孤貧動有大志迨夫極科第之榮入侍

禁廷出掌名郡方綽綽乎用之而不知其所窮顧其學曉于兵在蜀守日拒潼河劇賊一呼斷渡庸帥誤下令而撓之

天子迄知之寵以冠飾進于岳牧文臣有武事者莫不動色相慶此違其用而善以成其用者也又素習治獄在山左廉使一丐人承奸殺事方誦實待勘爲庸吏執誕詞而故短之遂以去位

天子迄知之留之史官書生明法律者蒙過失之宥事亦其常
此需其用而非終于已其用者也夫士大夫而能理兵刑其所
設施不亦大有濟于時而爲

朝廷所不可多得者哉視墨守談文章遠矣當其爲翰林也一
典閩試一視楚學所在得人生平磊落自喜不爲谿刻之行舉
重大如有成算與人交尤切切焉以道義相終始嘗語予曰如
某之受

堯舜知遇圖報且無盡期而敢以林泉取適乎歸田後以他事
左官不赴今齒逾六十鄉里尊之爲師所居經史巷爲何義門
學士故宅以其近竹堂寺假竹堂自號而併爲之圖予與先生
同籍老友四十年來遊迹親疏不時而其所深契於中者恒在

此不在彼獨想見先生丰采虛中自固直節不阿翛然於竹間
遇之詩云有斐君子終不可諉兮此之謂也

題寶祐橋書事

家里許田澗中小石橋其梁偃面鐫宋寶祐四年大呂月庚申
日許君和君禮君寶君慶換造石橋以繼先君之志卅字字殊
古拙知許亦仁孝人過者弗覺也近始出之爲揭寶祐橋于道
以彰六百年來舊蹟大清道光壬午題

重修道鄉書院引

使者及第之歲恒公敬軒分守吾袁其時若修學宮試院皆郡
大舉例請於有司督紳士踴躍集公以爲振興人文發揚科名
之本始倚公力實多至今袁人須弗輟今年春公自袁遷守平

樂余識公桂林閏六月巡校至平復與相見迺率攝通守高君
喬山平樂令蔡君雙石揖而告曰平郡之有書院舊矣厥創始
於宋寶文學士鄒忠公浩以道鄉名茲歲久傾圮僅破屋數楹
不足以供師生棲處又租粟歲入僅百餘金不足以給束脩膏
火之資書院之教廢而不舉者有年是以平之人文遜他郡登
科名選者亦稀是不可無以鼓舞而作新之也爰欲率八州邑
牧令捐俸以倡始事又欲進八州邑紳士之俊勸輸以宏衆美
又欲卽舊有租額爲之清釐其實籌度其贏議增產以垂經久
其章程定於官其樂助屬於紳士之好義者庶使書院之規模
與乎一新亟聘名師選髦士以教以養於其中群然奮興於文
章問學之徒以應我

國家屢開

恩榜之隆典則郡之人文日起科名日盛而郡守之職亦因是以舉焉余聞之載拜稱善曰公昔爲國子先生入槐市而談經再爲中書舍人履鳳池而掌綸今黃堂之太守也猶拳拳於子衿平之人其何幸矣乎使者請率先輸白金五笏以爲領袖於諸生